

671.1267
078
110

大城縣志

卷之十

五行志

祥符

災異

卷之十一

金石志

碑記

墓銘

大城縣志卷之十

上元趙炳文重修

吳縣徐國楨鑑定

五行志

自漢洪範五行傳出而煩數怪僻無當經術適足惑人心我朝崇正黜異凡降福降殃之事皆歸之於理不飾祥不諱災上天垂象皆以自警焉與宋臣李沆之意合平舒之祥不數見而水災則歲無之備書其苦以俟父母斯民者拯焉

祥瑞

後魏

神麿元年九月章武郡獻白兔

魏書靈徵志

明

永樂十五年秋大有

國朝

康熙十年大有年

十一年王文里民人申化龍妻邱氏於九月二十五日一產三男

雍正二年大有年

乾隆九年大有秋

十八年有年

十九年有年

二十年有年

二十五年大有年

二十九年有年

四十年有年畝地收糧石二斗

四十五年有年

四十九年有年

五十一年有年

五十二年有年

五十二年麥大熟

嘉慶元年有年

三年有年

四年有年

七年有年

九年有年

十年有年

十一年有年

十三年有年

十四年有年

十七年有年

二十一年有年

二十二年有年

二十五年有年

道光元年五星聯珠

五年有年

六年有年

八年有年畝地得粟八斗

十三年有年

十六年有年

十七年有年

十八年有年

二十九年有年麥禾皆大熟

咸豐四年有年

八年有年

九年有年

十年有年麥秋畝地五斗

同治元年日月合璧五星聯珠

三年有年

七年有年

八年有年

九年有年

十三年有年

災異

前秦

幽州蝗廣袤千里

鄭樵通志

元

延祐六年滹沱河決壞民田廬

明

洪武十八年旱

永樂元年四月太白出昴閏十一月地震

十四年蝗九月地震

十八年六月大水

宣德元年地震

三年大水

四年三月飢

正統元年四月蝗旱

四年大蝗六月大水

六年飢

十二年蝗

十四年正月地震

景泰元年閏正月烈風

四年夏蝗秋大水

五年正月積雪連陰飢

天順元年六月己亥酉刻大風雷雨驟從西北來拔樹
壞屋雨雹大如雞卵經時不化

四年六月大水壞屋溺人

成化元年八月大水

五年閏二月風霾

六年二月二十八日大風雨沙色黃染人手目天地

晦冥色映窗牖間如血已而黯黑不辨人色三月三日微雨後忽黃氣四塞日色如青銅無風雨土拂之如塵積地皆黃次日大雨時天或紅或黑七月水災民飢

八年春夏大風不雨河水涸六月蝗

九年蝗

十二年七月黑眚見時夜間忽有物負黑氣自戶牖而來雖密室不免著人則昏迷不醒或手足頭腦腹背被傷處出黃水亦不甚痛數日遍城驚擾夜各張燈持刀自防有黑氣來輒鳴金擊鼓逐之多有見者

其物黑而小金睛修尾兼旬始息十月地震

宏治二年六月大雨水溢房屋傾倒人畜多溺

六年大旱

七年大雨雹

十年五月風霾地震

十三年蝗

十四年夏蝗秋大水

正德元年正月地動天鼓鳴星斗晝見白虹貫日三月
星隕如雨天鳴地震

六年十一月地震

七年黑眚再見形兼赤黑大者如犬小者如貓若風行有聲夜出傷人有至死者人夜持刀斗相警踰月始息

八年冬燠如春

嘉靖二年大風沙晝晦

五年春地震

八年五月隕霜

十年大水

十四年淫雨夏蝗

十五年地震

十九年秋大水害居稼

二十一年蝗飢疫人相食

二十七年地震

三十一年地震

三十二年飢人相食秋大水決河堤平地水深丈餘
縣城水圍上城登舟

三十三年春大飢人相食夏大水平地丈餘

三十五年大水

三十八年大水

三十九年夏蝗

四十年疫大水

隆慶元年六月大水飢

三年夏蝗秋水

萬曆六年大水飢

十年人患大頭瘟死者枕藉苦傳染弔問俱廢

二十六年蝗

三十二年大水禾盡沒

三十五年夏霖雨大水各河決民房盡行衝毀水及

城下

三十九年大水

四十一年大水

四十三年大旱

四十八年大風霾晝晦

天啟二年五月雨雹

四年地屢震屋瓦動搖夜不敢寢多有露宿者

六年蝗潦大水六月地震

崇禎元年六月始雨八月隕霜地震

三年大水

九年雨潦

十年旱蝗

十三年旱蝗

十四年春大飢人相食道殣相望

十五年夏蝗如煙似霧木葉草根一過如掃疫染者
卽死

十七年二月丁日大風屋瓦皆飛文廟燈火盡滅祭
不成禮

國朝

順治六年大水

九年大水

十年大水

十一年五月大雨如注連十晝夜諸堤盡決平地水深二丈

十三年夏雨雹大如拳菓木有秋花者

十四年大水

十六年冬地震

十七年春大旱六月十九日始雨連縣不已春苗已枯秋苗復沒飢

康熙二年雨潦

三年春三月大雪夏雨潦

四年七月初七日地震霍雨五晝夜城垣倒壞十之

六七縣境民房坍塌不下數萬間大飢

六年大水

七年河水泛漲大潦

八年水

九年旱

十年旱

十一年旱蝗

十二年夏四月大旱

十三年春夏旱

二十四年麥大熟是秋水

二十八年旱

三十二年水

三十三年蝗不爲災

三十四年水

三十五年大水

四十二年五月二十二日甲子連雨不止大水

四十三年大疫

四十七年大旱

五十三年夏大旱七月十三日始雨

五十四年雨水過溢

六十年春夏大旱

雍正三年春夏旱六月雨四十餘日大水

四年麥大稔是歲疫

十一年水

乾隆二年旱

三年秋大水

八年大旱炎風如炙人多暈死二麥盡枯秋禾未種
十年旱

十一年大雨水

十五年大雪

二十一年旱

二十二年春旱夏蝗蟲爲災秋澇

二十四年春旱夏蝗蟲爲災秋澇

二十六年河決大水

二十七年大雨水

三十年大旱

三十五年大蝗

三十八年大旱

三十九年大旱地皆不毛

五十四年大雨平地水深數尺河決

五十五年河又決大水

五十七年大旱

五十九年滹沱河決大水

嘉慶二年清河決平地水深丈餘

五年沿河水南堤決

六年六月間御河溢十餘日水至我邑平地水深丈五尺沿河黑龍港河胥無岸房屋皆沒

八年大雨與河水等

十二年大雨雹大如碗樹木皆枯禾稼俱盡

十五年清河水溢丈餘

十六年秋彗星見光犯紫微垣

十八年有教匪歲歉八月十四日霜

十九年春夏旱秋八月十四日雨霜

二十年大雨

二十三年伏天大雨

二十四年十二月大雪雪花如碗落地有聲下至二十一日平地深六尺餘門戶皆封民仰屋柴而爨月餘不能出戶

二十五年七月二十五日天鼓鳴

道光元年秋七月大疫死者無數

二年六月間御河決水至我邑高原稍有收成

三年七月初御河子牙河黑龍港河皆溢悉無岸

四年春至七月不雨以前年地溼有禾七月下旬飛蝗大至食禾殆盡

九年立春至立秋無透雨略有田禾又爲螟蟲填爛農民無得原種者

十一年七月初四日大雨自未至戌始止平地水深七尺古所未聞時稷熟農民撈以度命十一月十三日大雪平地四尺

十二年三月十八日雨半寸夏大旱秋七月初七日

雨二寸初十日雨足民方相慶十五日至二十二日連八晝夜大雨如注二十三至三十日又八晝夜如注平地水深丈餘廬舍傾倒過半黑龍港河無岸

十四年七月初子牙河決

十五年七月子牙河決歲歉

十七年冬十二月大雨水流冰開

十九年夏六月間淫雨數日禾多澇死

二十年秋七月子牙河決

二十一年八月初十日大雨雹如斗鄰邑樹木田禾

皆敗獨我邑有秋

二十二年有白虹亘天長數長

二十八年夏六月初七日大雨平地水深五尺歲歉
咸豐二年六月二十八日大風雨奇寒

三年歲歉夏六月子牙河決秋九月粵逆破滄州北
上我邑被水得安堵無恐冬十二月二十九日大雪
平地深尺餘

四年正月初九日粵逆南竄沿河一帶村莊多被蹂
躪

六年春三月天雨黃土

七年夏六月初六日飛蝗蔽日天如陰數日盡去

八年秋有彗星見光丈餘直犯文昌宿次

十一年夏旱彗星見光犯紫微垣長經天

同治元年二月二十六日黑風晝暝六七月大疫傷人
無算七月十四日流星如織自東北而西南

二年夏四月有火星自東南而西北隱隱有雷聲秋
七月又有大火星落如盂

四年春太白經天

六年春夏大旱麥失收斗粟千錢秋馬賊至知縣彭
瑞麟禦卻之

七年滹沱河決我邑西北年年皆被水患

十年夏六月淫雨八晝夜房舍皆傾圮秋八月又淫
雨八晝夜大水民大飢

十二年黑龍港河決

光緒元年歲歉蝗蟲交相爲害

六年夏六月二十三日申刻天大雷電以風禾盡偃
大木斯拔

八年地震

九年滹沱河決平地水深丈餘民大飢

十一年大水

十五年五月二十二日始落透雨六月十二日卽澇

十六年夏六月淫雨十日滹沱河決

十八年大水

十九年子牙河決大水

二十年大水

二十一年四月初三日淫雨三晝夜房舍皆傾圯平地水深四尺初九日子牙河決大水斗米三千錢六月子牙河又決大飢

二十二年秋七月初一日大雨平地水深尺餘子牙河決

二十三年夏六月二十九日雨始透七月十一日子

牙河決大水

大城縣志卷之十一

上元趙炳文重修

吳縣徐國楨鑑定

金石志

古人云至誠貫金石況勒諸金石者皆至誠之貫注者哉凡古人有大功者其至性皆不可磨滅而金石亦與之昭垂於天壤故覽祠廟諸碑可以見偉人之建樹覽河道諸碑可以見艱鉅之底平覽墓道諸碑可以昭一朝之德業而見其精神豈徒與集古金石諸錄誇多鬪靡哉故志之

碑記

重修文廟碑記

馬克忠

皇宋呂蒙正作孔子廟碑云聖人之興也能成天下之務能通天下之志然不能免窮達否泰之數是故達而有位則聖人之道泰堯舜禹湯是也窮而無位則聖人之道否我先師孔子是也此時之所值雖殊而功之在天下萬世者則均爾昔者大道既隱其風漸漓英靈始謝於衰周德教方隆於大漢闢邦家之正途播古今之彝憲百王取法千古師宗信乎夫子之道消息兩儀損益三代立三綱而垂五教正禮樂而辨中外其有補於生民而垂之萬世者

蓋賢於堯舜而禹湯莫之過也郡縣各立學校以吾夫子
爲宗而配之諸賢所以崇德報功也自兵燹之後積百年
祀典衰而文教微平舒故有文廟黝堊漫污瓦甃剝落廢
毀殆盡至今二十三年達魯花赤楊公宰邑下車之初躬
謁聖廟覩草莽荒蕪之狀咨嗟瞻顧有戚於中乃與其僚
屬及諸士夫謀曰聖廟未新文風未振尹茲邑者能無媿
乎於是命工計材規辦貲費相農隙誅茅茨卽故基爲築
垣墉自殿廡以至齋舍靡不聿新宏敞軒闊璀璨輝煌視
昔則加隆矣故崇祀有所而神得其依授教有居而士安
其業俎豆生輝儒林生色楊君功在庠序亦偉矣哉爰自

經營之日不期月而落成蓋以侯躬親其事榱桷磚植之類積儲素具無取給於民也宜其成之速而公無廢務民不知勞也邑人張溫劉澤等適觀厥成而樂民之不擾懇余書於石以揚其美乃從而銘之銘曰聖道昭彰兮儒風慶延崇彼廟貌兮厥功茂焉雕蕙畫棟兮金碧相鮮琢詞貞珉兮奎壁星聯春秋致祭兮陳其豆籩人文宣朗兮億萬斯年

修葺文廟碑記

凡天下亘古今皆民也合天下古今之民而各遂其生各正其性各安於君臣父子夫婦昆弟朋友之倫士農工賈

之業而不相傾軋不相遺棄孰爲之道也道何以一天下
古今教也道統開自堯舜而其教宏於孔子孔子紹列聖
之傳啟百王之緒垂教萬世罔不蒙休被澤涵濡於大道
之中而不自知休哉厥功蔑以尙矣然下者之率從由上
之表率上之崇奉不誠則下之率由不謹異端其而撓之
惑於異端者將叛而去之周秦以來佛老申韓管商楊墨
其已事也而一綫微言必不可絕是以崇祀之典代有加
禮漢高章祀以太牢唐奉牲幣悉視上公周太祖躬親拜
奠元加封文宣王有明洪武之世易王爲師嘉靖之朝更
像爲主要皆隆其典禮以崇道俾天下知所率從罔或越

我朝車書一統聖教昌明統遐邇內外胥歸同倫之化則

聖天子隆禮師儒表章正學之功其徵諸庶民著爲治績者視往代爲尤盛也大邑爲皇畿至善之地其民純樸其俗敦龐蕞爾一隅絕無畔道離經之輩謂非沐浴聖化者久而遷善不知歟然天下之大後世之久烏知無殊方異類倡邪說以誘斯民者耶鄉黨之間顛愚之眾烏知無厭故喜新爲邪說所惑者耶吾甚願斯民之守正教而不爲奇袤所誤也吾深恐斯民之奉教不篤而易爲奇袤所誘也蒞任以來與司鐸 亟以正人心厚風俗爲念展謁

先師奉行祀典而見其周垣傾仆棟榱朽蠹心焉負疚如
疾疾之不釋於懷夫宮牆不葺則瞻視不尊也威儀不肅
則心志不懾也因循之漸成爲玩褻其何以篤崇師表而
勤斯人畏神服教之思哉乃集紳耆飭材鳩工以襄厥事
環堵旣建桷構榑之殘缺者易之丹雘髹漆之漫漶者
新之締構旣堅典制大備工成蠲日舍菜將集多士於茲
講德行道義明親義序別俾圍橋觀聽者耳濡目染庶浸
淫於先聖之教知斯道之不容背而去也則此舉也非
爲侈華美壯觀瞻實以正人心厚風俗範一邑之人於聖
道焉爾

重修文廟記

呂式榘

邑人

天地載道者也堯舜禹湯文武行道者也孔子傳道者也
天地有壇歷代帝王有廟崇祀皆不出京國孔子一布衣
無權無位不等天地帝王而有廟且通祀於京國郡邑非
因其上律下襲祖述憲章而傳道於天下後世哉此所以
爲萬世師表而大都小邑皆立廟也我大邑文廟由來已
久自同治某年重修迄今三十餘年矣風雨所侵日剝月
蝕廟貌不復壯觀邑侯趙父母蔚然於去歲下車後卽倡
捐重修城隍廟雖隱有重修文廟之心而工費較鉅又不
能謀諸市儉商民待時乘勢固未嘗一日忘也今正鳳臺

書院團拜張廣文琴軒言於趙公曰書院團拜會萃人文
欲修文廟此其時矣因知王公霞村樂善好施延之籌畫
修款首倡捐資並延劉公雨亭竹生廣募闔邑士民集腋
既多於是擇期舉事鳩工庀材邀李公均王公澤元監修
焉二公皆非富紳而自備資斧不染公款絲毫一切銀錢
出入悉商之於縣尉張公營總王公次第修補佈置有條
垣墉之圯者築之材木之蠹者易之丹漆黝堊之漫漶髹
飾而增新之中夏興工彌月而葳事翼然煥然頓改舊觀
允可妥神依縣道教矣異日登堂拜奠觀瞻既肅奉祀彌
虔尊禮先師與尊祀天地帝王庸有異耶斯舉也邑尊趙

公倡其始王公霞村總其成而協理則營總王公縣尉張公並竹生雨亭兩劉公也至監修之李王二公負介任勞不費公款尤爲可敬可嘉云

彭邑侯創修書院碑

任聯第

邑人

鳳臺書院立定條規謹敘其事預告後之董事者我朝文教覃敷各處設立書院以培養人才甚盛典也大城舊有義塾而無書院官斯土者有志創修以無款可籌而中止縣治東沿莊有官荒地二十頃有奇向爲遊牧地後河水淤爲膏腴鄰近居民盜種焉往往爭奪成訟邑侯諭示種地戶出租積爲書院費時地無糧未蕝厥事同治中賢

侯春圃彭公甫下車卽召紳耆議立書院時值兵差絡繹兼攝他邑篆未果及回任憲文催官荒地升科復召紳耆議乃上詳藩憲地歸書院完糧奉 旨交戶部註冊合邑捐銀一千伍百餘兩爲辦理一切費終年乃成維我賢侯屢詳上憲大費心思成此盛舉捐廉猶其餘事非爲一時計蓋爲百世計也從來善作者不必善成善始者不必善終事之廢興全在董事者加意與否茲議定城鄉董事二十餘人輪轉知年開課日齊集院議事及冬日止課時核算一年費若干議明年事每課以六人監察有年邁不能任事者卽公議一人代之永遠爲例世世如斯竊有望於

後世之賢者

重修城隍廟碑記

戶部尙書

梁

材

邑人

禮曰有其舉之莫敢廢也有其廢之莫敢舉也是禮也祀之義也明其義可以言祀矣莫敢廢者神之當祀者也當祀而不祀謂之疏莫敢舉者神之不當祀者也不當祀而祀謂之諂是在有司加之意耳粵稽城隍之神爲地祇之屬其名昭於古史其用著於周易保障土地衛捍生民當祀之神莫大於此故廟祀始於唐達於宋猶未徧之天下迨我太祖混一寰宇遙清祀典天下城隍皆錫之以爵在府曰公在州曰侯在縣曰伯此定制也大城縣城隍封伯

爲顯佑舉而祀之其敢廢乎廟在邑之觀音寺東隅殿三楹而兩廡翼焉刼建之始莫之能攷重修於天順元年迄今五十餘載厯歲滋久日就傾頽戶牖垣牖悉皆剝落非昔人崇祀之意也適安侯來宰茲邑治人事神罔不注念覩廟貌之陵頽慨祀典之廢弛亟圖以撤新之發官緡以易材植而所費不給更風邑士中民以助之不勞民力不蠹民材時以農隙人以悅使越三月而告成焉董其役者田信孫鵬皆邑之良也謂廟旣重修當有以記之而問言於余余惟神鑑人非人不依人以事神非神不佑人神之理本無二也茲城之祀豈徒以捍災禦患已哉吾聞聰明

正直之謂神則福善禍淫實惟城隍之職今此下民能爲善以去惡者若神陟降左右而不敢斃則福履無疆垂之子孫不替神之所佑不旣大乎是不可以不慎也雖然幽有鬼神明有禮樂有司之施於有政無非神道設教耳誠觀安侯之仕平舒也伸節以礪民之行率義以作民之勇彰善以示民之勸輝惡以示民之懲法制凜然而不可犯眞如神明之在上也爾士民能遵侯之令而守之不渝則可以免刑憲之辱悠悠於太平之世是安侯之錫福於民卽城隍之佑之也若曰神可媚而徒務焚修之末縱肆邪僻無所不至是自貽伊戚而已其如神何哉士民其慎之

是工也始於宏治癸亥之冬成於次年甲子之春碑記則
鑄於正德之丁卯也安侯諱佑四川嘉定人父子俱登第
美政之在口碑者不敢漫述其勳名則未艾云

重修城隍廟記

主圖永 邑人

夫域有善惡兩途有彰善癉惡兩法當世所爲是非榮辱
後世所爲興廢絕續者在焉然而有司其符者有察其機
者有握其權者世之論者吾惑焉一則曰輪迴報應固屬
不經一則曰命定不移阻人進修不若易之積善餘慶積
不善餘殃書之惠迪吉從逆凶爲正若于公待興於高門
嚴母掃墓於東海李廣不侯於殺降宋庠發跡於救蟻更

僕數未盡又不謂無其報應也蓋嘗論之善惡在人心報應在當世子奪在鬼神何也人惟一心心惟一理鬼神亦此理而已矣爲善者不愧於心卽不愧於鬼神而與休之理會鬼神察其善機而降以福爲惡者愧於心卽愧於鬼神而與咎之理會鬼神察其惡機而降以禍是善惡者禍福之符而人心則司其符者也人心者善惡之機而鬼神則察其機者也是故或膈衷而篤其祐或奪鑿而益其疾或先號而後笑或始吉而終凶或榮瘁止於當年或顯晦延及子孫變化匪一轉移靡定若懸鑑持衡錙銖不爽神之於人嚴矣哉余邑城隍廟建自天順修於宏正間廟制

甚狹東魯任公令余邑愛民以仁事神以敬下車謁廟憫其頽且隘飭工庀材易廟後隙地擴而新之建寢殿三楹團殿一楹前後兩廡門垣視昔增宏敞焉屬余爲記余曰我侯非徼福於神也亦體朝廷彰瘝之意以襄人治之不逮耳蓋人或可欺而神不容僞凜然易惡遷善而爲賢人君子之徒則神之默相也多矣爲吾民者果能奉公守法履規蹈矩敦孝弟習仁義不失節昭昭不墮行冥冥顯不干吏議陰不懼鬼責其於皇古之風可庶幾乎時萬曆癸子歲也

重修城隍廟碑文

景榕曾

邑人

蓋聞神所憑依者賴有廟宇人所肅敬者藉以觀瞻邑之城隍廟自前明天順年創建於正德萬厯間重修原爲保障一邑庇祐萬民而設也逮及我 國朝越百餘年矣其間雖不乏補葺而終未重修以是牆垣日壞殿宇漸傾卽厯任邑侯有志鳩工構造又慮大功難就而不果會有我邑台頭村郝公萬倉見其廟貌荒涼神威慘淡遂慨然獨任重修之舉興功起造煥然維新是歲爲道光之十有三年迄於今又厯四十年矣能無風雨催殘日月損壞哉我前邑侯蔡鶴君大令亦嘗謂斯廟主一邑之福庇爲萬民所尊崇詎可任其坍塌而不亟爲修補第蒞任年餘卽陞

遷宛邑雖有志焉而實未之逮也迺有靜邑邊公諱重慶

者因公來平舒寓於道舍之東偏見夫棟樑已朽剝宇將
傾躍然有補修之志遂邀集邑之紳耆卜吉興功將正殿
兩廡山門羣牆馬殿映壁逐一更新不雜畫宇雕樑而且
金身塑像儼然神威顯赫殿閣崢嶸此舉需費三千餘緡
洵堪媿美郝公矣惜值時季秋歲聿云暮不能不有待於
來年耳於戲公於是歲之春偶染微疴竟於七月念六日
棄捐館舍公一生素有樂善好施之志於本邑中修典廟
造義渡賑貧窮廣施濟種種善行難以枚舉其哲嗣尊三
克繼先志復於是年中秋望前彙集工人續修寢宮陪殿

加之以粉飾施之以丹青益見宮闕之巍峩殿宇之壯麗於是構石勒碑以記告竣之時日非欲矜我之好施昭著於禩世亦非欲求福於一己獲報於後人也蓋欲後之同志者繼爲補葺增修以垂永久歟余爲記余不揣謏陋略述顛末以誌不忘並以達邊公之意也云爾

重修文昌廟記

知縣

蔡壽臻

桐鄉人

攷文昌六星昭垂天象自陰陽之說興而司錄之事著唐宋累封於西蜀迨元加號爲帝君天下學校始有祠祀明因之我 國朝稽古右文列入祀典咸豐中葉復允禮臣之請升入中祀典至盛也大邑文昌閣之建始於康熙丙

子之年風雨漫患殆將傾圮司鐸唐君

文智

顧而憂之遂

於同治十二年鼎新文廟次及斯閣前令莊君

允端

復捐

俸百餘金益以邑人之助舊觀頓復而丹堊之飾因費絀

而正

壽臻

蒞茲邑下車展拜悉其故竊歎前令莊君任事

之勇且勤而惜其功之未獲竟焉爰於今春集貲鳩功兩

閱月告葺巍然煥然誠足係一邑之觀瞻崇斯文之主宰

臻

何幸而得樂觀厥成也謹識其顛末以告後之牧斯土

者並附列捐貲姓名於後示善與人同之意云是爲記

邑侯劉父母生祠碑記

劉漢儒

邑人

公宰余邑已五稔於茲矣今因箸籌乏人乃以樞曹需公

而公去矣邑之若士若民無可以留公者僉謀祀公祠以志去後之思相與庀材鳩工不日而告成焉會余以使命過里其攀留公之意與士若民同而欲垂不朽以寄所思者得士若民之舉而乃暢遂援筆綴公之嘉惠余邑者以識其大概云公自癸亥六月分符平舒值有徵兵索餉之檄應接不及三輔之地所在俱疲於奔命獨平舒尙有妻子而完其髮膚者皆公以去就爭利病以轉移當緩急此從古疆項之吏有其慳直而無其斡旋也公自蒞任來未嘗督期追呼而急公賦者如流水卽蒲鞭可以不施良由徵收一則乎國額不以出入岐多寡則民之感可知也會

審編一切弊竇絕之徭役汰之舞文之吏毫不得高下其
手真不假燃犀而魍魎立消者道頌神君人謂之照天燭
以其至公也未及瓜期際覲天之典都御史及御史以課
最聞嘉其循良乃褒父母以龍章錄卓異也琴鶴重來竹
馬再躍攜日邊雨露翩躚舒城夾岸桃花一簾秋水皆足
映帶仁侯之襟抱矣最異者澹泊無殊乎韋布鎮靜不擾
於紛拏茹冰蘖而清畏人知理盤錯而才恥外炫此公五
年來喜怒不形於色競綵均調于適者也余邑最僻處一
隅近爲津門添設撫餉輸蹄之苦什伯於他邑公爲之清
假借杜需索則豪猾者含怨而民獲有甯宇是豈尋常撫

摩所能調停者耶於是人人含造化陽和處處醉枌榆社影至普文公之化雲漢爲昭一榜而獲兩人皆公素所識拔者其有造所及尙未艾也登斯民於春臺開後學之長夜父母師保公其兼擅矣乎是以賢聲遠被畿輔之內負糗糧而質成者如市公片言折之桁楊不事可謂丹筆生春矣則波及傍邑者不又公之餘也耶一旦晉秩樞曹螭頭拜舞楓陛籌策天下皆想聞其丰采但河陽花色單父琴聲種種繫人心脾若士若民借寇無由不勝徬徨不勝祝籲無已呼天而泣又呼父母而泣則今日祠堂之成也詎獨爲揄揚公之嘉美乎哉余謬附同籍之好實切庇廈

之榮敢謂瑣瑣颺言有當於公之鴻勳懋猷然他日銘鍾
鼎而勒太常余言不文或亦可當副本此石不朽公之留
爲舒民思者亦不朽矣公諱景耀河南之登封人成壬戌
進士同余觀戶部政亦一時奇遇也邑簿山西曹諱茂才
邑尉福建鄧諱長春均有事於此祠焉例得並書以傳謹
記

誌文

劉漢儒 邑人

邑通和門外勦修文林郎知大城縣事嵩曙劉公生祠一
所立木主春秋奉蒸嘗庶民子來於丁卯南呂月告厥成
功扁曰慈愛祠經其地者侯實式臨之邑尉鄧公督其事

復捐俸金置地四十畝所以飾簠簋也卽命陶應登居於斯稽於斯晨昏供香火於斯祠成量其地七間五分寬廳堂三間祠東屋三間丹堊輝煌暈飛鳥勒峴山甘棠其劉公之謂與聯曰雒下擅詞名筆底花生嵩帶曙燕城推卓吏堦前春暖柳含煙又曰對客譚民心自赤焚香告夜意常清可歌可詠者此也軍興值子午之衝甯益下不妨損上慨然勞怨不避民其瘳矣檄飛來癸庚之呼旣裕國兼以恤民惻乎調停惟艱帝曰欽哉宛然寫生手也鼎爐兩座篆文皆出新裁几案一新俯仰依稀面對萬年之遺澤不朽一方之保障無窮覩庭柏而萊柏常鮮盼門石而金

石不渝此去後思可永帶礪而勿替者也謹誌

奉文禁盜決廣安鎮堤工碑記

邑令謝鍾齡

嘗稽隄防之設自古已然況行水另有其地而藉以保一

邑之城郭田廬兼以庇鄰封數境之廣則堤之關係以下

缺二十八字

合流至天津歸海由來舊矣邑西二十里廣

安村前成字號報部堤長九里零八步接河邑孟橋至舒

城乃舊千里長隄也以下缺三十餘字利淺近濱河另築

孟橋以上舊堤弃而不修而大邑則常守昔人之成規爲

謹若失此不但廣安而本邑以下缺二十餘字康熙三十

二年河邑王華村濱河堤決直沖此堤而一州三縣沈溺

九城縣志 卷十一
數載當事詳請題奏蒙

聖祖仁皇帝發帑興修又雍正三年河邑張各村河水漫溢前令李君開王凡村前大堤放水歸河又以此堤齧於波浪請題修葺蒙

世宗憲皇帝簡員發帑重修完固誠以行水另有其地而四邑之命脈萬井之安危具在此堤不可不加謹以從事也乃乾隆三年獻縣高官河流泛漲潰堤東下余目擊浩蕩情形會河邑佐朱丞及城守施君復開王凡大堤力爲疏消及春可涸詎河邑菩塔等村民不以東開大堤疏洩

爲感反目此爲橫堤壅遏秋冬間三越月每聚數十舟簞

夜持械抗守扒堤卽欲一洩而盡

缺五六字

嗟乎河民亦

忍矣哉下而長堤圍繞河高地下水入則不能出矣抱性命之憂者不獨在大邑而大邑之士民最先受害時有生員李煦等廉知盜扒確控經具文通詳合蒙直隸分巡天津河間布政司參政兼管河務道憲陳熟悉河道堤段情形區別利害軒輊一面請帑工賑興修一面親至堤審究研訊之下分別情偽洞鑑幽微河民氣阻辭塞惟有叩首階前懇恩超釋復蒙憲仁如天原其被淹情急姑從寬典於連月盜扒之趙某照不應重律擬杖八十知情之保長金某邀眾之趙某照不應重律加一等杖九十兼令

後有水患稟官移會在王凡大堤開洩如敢再行盜扒卽照故決河堤防律治罪勒石禁詳

宮保尙書總督部堂孫批趙某等盜決廣安堤埝狡不承認而屢次盜扒確有實據又不肯供盜扒之人明係知情同夥本應按律究辦姑念被淹情急如詳趙某照不應重律杖八十保長金某知情不舉縣舊役趙某扛幫附合照不應重律加一等杖九十均按擬熱審減等八折發落以儆將來並飭河大二邑嗣後偶有水潦卽速會勘開王凡大堤洩水歸河毋許再行盜決廣安堤工等因

藩憲移咨道憲行河捕分府轉行到縣蒙此除批檄存案

外仰遵憲仁明斷勒石記德永垂不朽

乾隆四年立縣丞

朱永望書

新改河堤碑文

竊維

皇仁洪鈞水土治而萬世永賴

憲德誕敷平成奏而億兆蒙休遐邇懽騰士民慶溢茲
因子牙正河乃滹沱之下流也境屬大色地方而西
北則有文安霸州保定相鄰地勢窪下忽值河水溢
出則積水數年而民不聊生恭奉

聖祖皇帝愛民如子不惜數百萬金修築河西堤岸以防

水患但子牙河水流通海地勢甚紆一遇河水漲發西堤卽遭沖決必須支河以分水勢欽堤方保無虞適於乾隆二年自楊家口河唇決口北灌地經靜邑歸海甚順西堤不遭水患可保安堵如故卽靜邑地方又有泥淤之利此天假數郡以有益無害之道也

幸蒙邑侯 謝公靜邑 韓公青邑 田公三縣會

議順勢開河現有遵依在案於是如結轉詳前任天津道 陳公親歷查勘移會永定道憲又蒙憲委三家淀分府 徐公查此俱應開河廢堤緣由據實詳

報會詳

上憲荷蒙

總河部院顧
總督部院孫會核題於乾隆五年二月二十八日奉

硃批大學士會同該部速議具奏據

內閣大學士鄂勘得應於楊家口河唇舊口處順勢開
挖按地除糧邇來水不揚波共慶安瀾靜邑漸成膏
腴西堤奠如磐石霸保文大永無積水之災常享粒
食之樂矣俟後倘有假公濟私之徒恣意杜閉則上
干

國典下違 憲合法所宜懲律有明條幸蒙邑侯 劉
公厯查前案據實詳明以准仍順支道不准堵塞附

大城縣志 卷十一
近村莊永免夫役

皇天之恩膏大如乾坤

道憲之德澤深同雨露淪肌浹髓刻骨銘心敬述來歷
以垂永久云爾

乾隆十二年二月十六日

文

大邑士民公

立

公修黑龍港河岸記

喬峻

大城知縣

大邑河南共四十八村地勢低汙歲患漫溢西南患沿河
東北患黑龍港河居民苦之沿河自康熙中建有堤當
卽丈量段落於近堤三十村無論士民按地均分作爲堤

埝春築秋防又於各村設立看堤堤長查催修理由是沿

河水患可保無虞立碣於白楊橋旁相沿遵守黑龍港河亦係滹沱河下游兼受河間獻縣一帶大澤之水春雖涸竭而夏秋泛漲勢與沿河相埒先是專責夾居黑龍港之十八村通力合作亦春築秋防歲以爲常嗣恐人力不齊官委工正工副各一人督催辦理與沿河各就其所近者而分防之此往日舊例也遵行七十年相安無異議自乾隆二十年以後法久漸弛舊堤日殘不獨水患倍前而各該村旣廢其業官因令其供役於河北之堤岸令此十八村協修三十村之隄自救不贍而復迫之舍其塋墓田廬而往防他所獄訟爭起案牘日煩矣余因查勘堤埝細心

諮訪遂廉得其實夫秋水漲發沿河與黑龍河皆可慮也
分地防護三十村與十八村皆赤子也爲民父母而不爲
酌劑其平烏乎可因諭令各村居民各按厥役仍照往例
遵行又訪知楊家莊民楊士義王召莊民王省言朴實勤
謹堪充工正工副乃使爲十八村之督部署一定同聲稱
便而又恐其日久廢弛仍滋訐訟公請爲文勒諸黑龍港
河險要之處余惟地方官不能興利除弊而幸有舊章可
循爲斯民均徭役杜爭端亦責之無容諉者竊願與後之
蒞斯土者共安之矣遂允其請而爲之記

乾隆四十五年
庚子七月上浣

十八村曹家寺孫召莊李召莊楊家莊白廟王召莊呂召
莊前窪艾辛莊固家莊周家莊廣惠屯良台前流莊中窪

後流莊任前
莊蓋益莊

重築格淀堤碑記

蔡壽臻 知縣

興眾修築以防災患有司之事也身家自衛居民之務也
至於勢處難爲工不易就臨民者憂之不得不亟爲籌畫
以集其事則又一時之權變而非所云是經是程也格淀
堤由來舊矣向章民力修不得動帑東西十五里界文大
兩境之間障淀水不使南溢而其南則東爲沿河堤西爲
千里堤三堤之內惟大城之王家口苗頭段堤三村田園
廬墓盡在於茲自有是隄以來歲慶綏豐淀水無害則是
堤也三村之保障也同治初年河水爲患邑北諸堤盡潰

而格淀堤衝決尤甚三村因亦爲瀦嗚呼此隄成爲三村之利此堤廢爲三村之害余自壬申歲來宰是邑憫涇水爲災亟思治之會文邑稟 憲憲委牧翟公遊府陳公總辦文大工程先開引溝洩積水繼修堤防北漲 督憲過境尤殷殷以格淀堤爲至要諭以急修因款之難籌也乃奏撥春撫銀兩以工代撫爲修堤之費而格淀堤文大兩段皆令大城承辦余查勘大城堤段殘缺已甚需役孔多且此項銀兩原爲春撫之款遂於飭令三村承修外諭堤外被水各村皆同得赴工就撫於是眾力併集是板是築不數月而告成是歲也北水復漲而淀水不得爲災則三

村獲益豈淺鮮哉夫有其舉之莫敢廢也而無以善後則弊滋茲爲大城堤段定修守章程以示將來一於堤上築汛房二間募雇安人看守以便當秋大汛時堤捷於照應一每歲春間多栽柳樹固護堤土待其長成亦可備搶險椿料一每歲多堆土牛以備防險之用而取土必於五尺之外不得以堤土補堤一以上修守諸費皆王家口與三村按年輸出卽遇衝決築塞亦由三村承辦不得援此次辦法扳堤外各村致推諉誤事定此章程勒石示後總願堤內居民各自盡力以奠厥室家也更望後之涖斯土者鑒於茲焉

重修白楊橋碑記

乾隆二十六年

王建中

子牙河亦名沿河蓋滹沱漳滏諸水之支流自西南迤邐入境北折而東會淀池達津門歸於溟海環經縣治百有餘里設輿梁者有五曰白楊橋南趙扶橋姚馬渡橋子牙橋王家口橋而白楊橋為山左入都之孔道厥橋創始未詳何時廢者久之至前邑令王公諱績與邑士民興議重修又經邑王公諱植黃公諱可潤兩次重修緣河水渾濁湍悍伏秋汛發則奔騰湧溢故舊制於橋外復設小橋以分水勢迨後歷年已久漸有殘缺余蒞任數載來差務絡繹又無不時時驚心是以未遑經理亦慮重累我士民也

己卯秋上游諸水漲發小橋漂沒而正橋亦復傾圮余思
事之廢興出乎天長堤古渡聽其廢而不修當事者之恥
也爰圖爲鼎新之舉捐薄俸以首倡而紳士商民俱各樂
襄厥事於是鳩工庀材不數月而橋落成長十三丈六尺
寬二丈四尺六寸爲柱八爲空九列以兩廊佐以小橋引
以埤道一一次第修整計費千餘金則眾腋所集也從此
車鄰馬邁行人輻輳日往來於 天子蕩平正直之宇者
庶不至臨河病涉矣雖然莫爲之前雖美弗彰莫爲之復
雖盛弗繼余幸與士民得繼王黃諸公之志而將來之永
垂不朽者尤不能無望於接踵之君子焉是爲記

重修白楊橋碑記

乾隆五十二年

邑人

鄧民望

億瞻

白楊橋古名利濟其創始也不知何年自康熙五十一年

至今凡經五邑侯修葺

王王王黃張

要皆好仁勸善而成在昔

滏陽之水迤邐而來其勢緩而物價廉故成功也易繼此
滹沱之水與漳水溢水洑水匯注於斯其勢大而物價倍
故成功也難自乾隆二十六年邑侯王公建修已大費經
營矣至四十九年水勢迅急橋被衝折往來行人羣苦病
涉前任杜公發心捐修厥志未逮而榮陞幸我邑侯胡公
來蒞茲土接任之初卽留心民瘼而於白楊橋尤厪念焉
客歲捐廉倡義凡我士庶莫不踴躍樂襄盛事因而構材

鳩工肇修於上巳之辰落成於端陽之日由是北赴 帝
都南之山左者莫不歡欣載道厥利溥哉厥濟眾哉厥德
懋哉因思我胡父母下車以來其存心也法以廉其御眾
也寬以和其執法也嚴以平懷四知於清夜關節不通存
三畏於寸衷錙銖不染培學校而青衿色動剔夙弊而閭
左氣揚而且省差役以舒民力議公費以惜民財官事無
留滯三農乏失時之虞約信不輕發四野絕豪吏之呼詩
云樂只君子民之父母其以此也夫則豈特杠梁之成與
川流并千古哉望等幸沐德涯莫測滄溟許大雅蒙和煦
始知寒谷生春所慮者天章日下不次內擢區區百里烏

足羈驥足耶因草俚言永誌不忘且望後之君子蒞斯土而經是橋者知我胡父母之善政固如是也是爲記

重修南趙扶村通濟橋記

大城知縣陳 鉉

河橋之名肇於秦昭王五十年史記載之綦詳橋者趨也矯然而立所以便往來古者徒杠輿梁成而政體昭然義在斯也大城南趙扶乃東西往來衝衢沿河略界其前舊有木橋一座丁卯冬予自津門遷是邑見其形勢傾圯過者心驚詢之父老乃知是橋自乾隆壬寅經應楫杜令重修遺有碑記迄今二十餘年水災屢告民將自顧之不瞻又豈能爲征人行方便乎余蒞任之明年風雨以時歲稱

大熟餘糧棲畝家室盈甯越已巳春遂集父老而謀此舉
捐俸首倡紳士商民靡不歡忻鼓舞樂襄厥事於乘東作
之餘聚千金之重鳩工庀材月兩帀而大功告成嗟乎此
橋之爲利久矣觀邑志作於康熙之時惜未詳其創於何
日卽杜令碑記傳開河之初已設之而於其由來亦略焉
殆年遠而無可攷與今日革故鼎新民請書其事於石余
豈敢自爲功亦不過繼杜公之志云爾然是橋也以木爲
之非若石之可垂久遠也安保歷數十年不又傾圯乎哉
鑄諸石庶幾覽斯記者諒予紳士商民因其共繼杜公之
志有舉莫廢於萬斯年俾遠邇之人咸樂王道之平平也

是則賴諸後人君子

杜公碑記
今已無字

里坦鎮南小橋碑文

蓋慶康年者不忘水旱有偶值之天災履平地者不廢橋
梁有預防之人事相厥村南實維下隰爲商旅往來之要
路亦街市出入之通衢若大道果可常遵固無慮蜀道之
驚陷馬而潦水倘逢未盡將不免淇水之歎漸車蒹葭掩
映人在一方雲樹蒼茫虹藏百尺臨涯多阻利涉奚從恭
維啟堂劉老先生承好善之家傳兄終弟繼推濟人之素
志身體力行周族屬鄉閭之急由來篤厚可風憫行人厲
揭之艱爰是綢繆未雨運木石而我任我輦鳩工肇始於

三春策輿馬而載驟載馳成梁不待於十月擬仲舒之捐帶而築事本周詳較大宋之編竹而成德尤懋介偶爾鴉頭泛淥誰栽步步之蓮相看雁齒排紅我折條條之柳宛似河填烏鵲詎須游泝於陳川居然港近黑龍可任經過於圯上工竣於今日而樂其澤者將及乎百年事便於此方而出其路者遂由之四達稱誦不間於疏戚佩戴豈比於尋常雖爲善不求報非思要譽於鄉鄰而揚善有同心固已遍孚於遐邇凡我衆人共欽盛德仰義士之風僉謂修同薛惠荷仁人之利允宜名著崔公言是芻蕘匪等贊颺之失實壽諸金石用誌銘勒於弗忘告厥成功昭茲來

許

重修關王廟記

劉大受

邑人

今關帝之

而人儆

之哉惟忠義之在人心者愈久不廢

其所至如日月

之曜靈人無景思而崇奉之

百世而如見合海隅而

同心者矣余鄉舊無關王廟作之者始於先府巡宰公而

一時協謀以

襄其事者則有若李君鑑李君景春等厥

位向

厥基孔隆前臨通衢後帶岡阜蓋鄉人朝夕出入

之所必瞻者廟作於正德甲戌旣而歲月漸深遂就傾圮

歲庚申余以乞養家居二李君之子

大川謀欲新之

余曰唯唯是廟之修豈若他淫祠之無補於世哉王以忠義奪漢之末計與公鄉之人非世接而目及也前人仰其忠義而廟修今我後之人因其修者而重修之仰而觀俯而思其必返其忠義之在心者以求崇奉之本孝必於親弟必於長睦必於鄰仁必於老孤無告而又勤乃職務趨乃事強不凌衆不暴誦法詩書者不習夫空言策名公卿者必盡心於王事若是則廟之修不徒也不然則與世輝碧塗金徼福免禍以稽首於土偶之前何殊哉固非前人之意亦非此重修之意也後之居是鄉爲子若孫者宜有感於斯記

重修水月寺碑

吏部李應魁 邑人
郎中

粵稽如來降神迦維羅國淨梵王宮於時地搖六震天雨
四花神捧金盤龍吐香露投身雪嶺跌坐盤石苦行數載
方成佛果以故教闡西極法傳東土無論姬穆炎明之朝
尊崇其教卽我明興以還列聖相承崇儒重道之餘未嘗
不深信而供奉之也嗚呼望佛求福責報冥冥我不敢知
獨計佛至善也人誠卽念卽佛卽心卽善可以明順適可
以脫憲網儻所謂出苦海而登彼岸者非耶世尊普濟羣
生澤亦渥矣儒者何可以盡非之也大城迄南而東二十
里許地名樊二莊沿河之陽運河之右徐淮齊魯之康衢

楊公諱義之里也至萬曆三年還鄉探母偕四弟太醫院
吏目諱從禮五弟忻州訓導諱從龍侄千戶諱可蕃遊覽
故里景概及之莊左環觀四隅俱有神所廟貌森然中有
敞地千畝垣夷間曠輒發修建善念未決何祠歸告於母
母曰建寺可也竊恐勦爲或干國憲典議亦未決噫嘻人
有善願天必從之偶爾居人掘發其地獲一石獅子背造
太和年重建水月寺八字誠不知昉於時卽此可證其爲
古刹基也重修之議遂決於是鳩工庀材展采成事中構
大殿釋迦坐於前觀音坐於後環列菩薩羅漢前建山門
二層二門以內東構迦藍殿西達摩殿大門以內東構鐘

樓西架鼓樓塔下高樹旗杆二株上掛彩旛一對後置方丈香廚共十三楹週圍垣牆峻豎以防不虞往來瞻仰壯麗驚人金碧奪目斯亦平舒一大觀也檀越擇請僧人本龍住持晨鐘暮鼓朝焚夕誦一祝皇圖億萬斯年一祈兆民同登五福眞盛舉哉始事於萬曆之乙亥竣於萬曆之甲辰歷年三十費金千餘非求福田利益也無非尊母遺命不以久頃易念也公之忠孝可謂兩無負矣余故敘其顛末俾鐫於珉永垂不朽云

萬曆甲辰
端陽吉日

重修玉皇殿宇記

田見龍 邑人

若夫仙樓白玉窈冥崑閩之墟神闕黃金寂寞蓬瀛之浦

斯則岡巒彷彿稽鳳冊而空存島嶼憑陵艤龍舟而罕迨
豈若據坤軸之寶地載闕宸宮占象緯而圖基聿修昭事
者哉矧夫弭災消沴大千仰覆育之仁慧雨和風六宇荷
生成之德非精祇承奚迓帝佑大城縣玉皇殿者誌稱唐
鄂公所建也爾其旁臨崇阜睨疊巘之蜿蜒俯瞰深潭羨
波心之澄澈長林蔚蒼清颼奏隔水之簧豐草爛斑平野
鋪天孫之錦聽過橋鳴瀑晴日懸溜挹舞風纖條半空搖
翠時有鶴來華表鷺拂林梢遵回廊而徒倚疑躡紫霧於
瑤階循瑯楹而上馳恍見碧桃於洞口豈直玉臺爲觀僅
標形勝於蜀中朝天有宮徒肇浩眇於西京也哉歷代遺

迥久失締造登碣有路恨苔蘚之侵衣柱礎欲傾恣野藤
之纏轆薦蘋藻者因之愴歎過宇下者相視咨嗟有川道
人一日謂蔡文學曰此殿肇造蓋有年矣上雨旁風摧圯
殆甚牆棘路卉漸就榛蕪吾儕不葺誰其任者乃相與募
金營造採荆峽之松檟改造山門輦燕山之堅珉疊爲石
礎前後費金二萬餘緡於是重欒複棟霧緝霞張繡栴雕
欄鸞伸翬飛珍臺控景羲和有練轡之因綺榭裁氛屏翳
得停鑣之所似出重昏之境如連不夜之城會毛邑侯來
白晉陽旱魃爲災侯申虔告乃桑林步禱雨達沖漢之中
甘澍滂沱旋滿郊原之外自非誠參元化道叶鉉機烏能

捷應若此乎爰有黃冠又鉉等咸謂纖毫細德猶象美而垂芳鐘鼎微榮尙銘勳而作鑒况乎神威自在方傳葺造之功豈可棟宇常存不勒金石之蹟乃託幽鄙俾誌貞珉第才非夢鳥難題黃絹之詞技僅雕蟲聊記修葺之歲云爾道人姓杜名川蔡文學名拱樞俱邑人毛侯名雲漢山右人其捐施姓氏勒碑陰

重修三官廟碑記

邑人

鄧希皋

襄雍

夫元黃肇判兩儀開奠麗之形山岳峙靈萬國繁剏造之址凡以報洪庥答元貺祈鞏遐昌於不替者也是以里閭輻輳精祠疊珪璐以盤空闐闐集靈廟貌聳雕甍而映日

況飫神飶而食帝德如三官之尊可無專祠以崇祀者哉
小店村者自平舒而東所稱仁里也居民環聚砧杵之聲
相聞淳篤爲風循良之化久被雖民義無闕而神道未崇
添壽劉公性多虔敬雅尙修葺嘗念其祖隱德君

諱夏鼎建

三官神祠於店之吉壤星序邇迥致多圯壞盲風怪雨已
摧畫棟之簾夜鼠明烏穿落丹碧之色公慨其荒廢爰謀
修葺歲在丙寅挺爲己任經始於春之孟月落成於秋月
中旬凡費錢緡辦由公筭於是棲神有宇香供有資鐘鏞
有庀薦饗有地昔之漫漶者塗之丹壁昔之腐敗者剔爲
堅新如公者可不謂末流之崑柱風塵之表率哉夫自俗

競貨利至於慳貪滅性鄙瑣相沿孰有捐巨貲以崇神宇
任勞勩以修祖創者乎如是倡義舉以破慳貪之習俾鄙
吝者慕義而成風不可謂諂神也食三官之帝德而思崇
報於焉爲合經不可爲瀆神也非諂非瀆可追於前徽不
可謂非邁種而超俗也法得備書之以詔來者天啟元年
歲次丙寅秋月吉日立

重修大城縣迤東交河村龍泉寺碑

河南登封人進士 劉景燿 知縣

粵稽東平舒郡久著輿圖接壤畿輔邑東有村名曰交河
流通灌溉生民之利溥矣其寺名曰龍泉泉甘龍見天地

之秀鍾焉是地也時嘗金光耀露祥雲上騰允矣潮音之
聖境誠哉天竺之遺風也恭惟大佛之塔廟端宜於此肇
基以故弘治十年建寺迄今風雨摧殘漸就傾圮凡含生
秉氣稍有佛性者皆興荒烟蔓草之悲而善人信士保護
佛法者每起革故鼎新之念今上崇禎元年住持僧眞玉
暨儒生馬元陞共發菩提心合謀募化整飭正殿壯其觀
瞻修補兩廊除其樸陋以暨鐘樓鼓樓無非寶坊之點綴
也虔誠不二善願無邊借十方之資財繼當年之盛舉假
百工之建造爲佛土之莊嚴敘初敘末無綺語以陳詞書
姓書名按檀施以輯錄庶幾爲之前者既有以彰其美爲

之後者又有以傳其盛奕奕乎碑記胎垂借碧殿珠林而
生色赫赫焉佛光普照與龍宮鷲嶺而騰輝由是近悅遠
來香火日盛祈福祥者咸入法雲之地皈淨域者大開甘
露之門護國祐民永垂不朽而爲之領袖者其聲施甯有
窮期乎不佞出舍觀風日擊村和曠厚萬善同歸不覺生

大歡喜心而爲之序

崇禎元年
秋月穀旦

廣安鎮三官廟水陸殿碑記

都憲

劉漢儒

邑人

平舒居燕趙之分地連瀛海達津門西去縣治二十里鎮
名廣安適當孔道而輪蹄輶使每至止焉鎮地脈較他處
稍阜而厚桑麻梨棗之美頗甲一邑其居廬錯繡亦比櫛

若也往有三官廟初不悉其牒自何年其基址僅三楹後
草椽稱之一二頭陀輩就居不蔽風雨會少司馬小峰李
公稍爲葺補已有崛然改觀之勢矣其僧廣成正李公拔
之於行腳者想亦五百年劫種有善因乎僧少最獮人咸
嗾之然正爲獮也機心不起一味作如來護法暨其徒福
春持鉢孟肩行李往來吳越間幾萬里沿門募化得金若
干一種無賴方且剖腹而藏乃竟於殿後舊椽改造大殿
三楹爲水陸殿兩角各起禪室者二其東西雲連榻明几
秀又不可十指數也於是步留都虔諸水陸像輝煌耀麗
令人一仰對之不覺面孔欲唾而塵心盡洗也說者曰佛

氏以淨爲宗以無爲教斷絕一切而獨瓊宮瑤宇不幾令
寂滅者顧而反走乎余獨曰不然世情迷於塵網偶提以
清涼之境不啻於火宅溽暑中赤腳踏層冰耳但一意淡
漠索之無味捫之無跡易使人厭而思遯則鴛峰雪嶺金
璧珠衣未始非接引一妙筏也頭陀輩能作是果不大愈
脫離慾海未斬魔根乃執色空空色之說妄欲與彌勒諸
天爭坐位也耶且上方別刹雲影山光每足增遊人問津
之想而廣安鎮添此一段勝概觀風諸君子一睇覽之恍
見靈氣之萃集而爲人文增色也廣成詎止爲釋氏之功
臣乎余曾習業於殿之左廡禪燈慧性未必無默照之因

因序水陸之盛而並記之云爾

天妃廟碑記

天地間盛衰理也成敗勢也卽衰而復盛敗而復盛亦一定之數也故卦有泰否月有盈虧四時之寒而暑暑而寒者何一非盛衰成敗之寓於其間豈城郭村落廟宇觀瞻獨不然乎卽以吾鄉而論當其盛也泰山行宮與藥王行宮金碧相映復以柳陰橫遮綠波環繞遊人行至橋東見樓影倒垂目迷五色幾不知其爲水中岸上然佛閣僧廬星羅碁布參差於菰蒲竹樹之中者實景幽而地僻也今雖柳殘橋斷遊人跡希父老猶能爲余言曰某也樓某也

閣某也靜室某也臺榭可不謂一時之盛乎未幾明運式
微天將大有盛衰於中土也 聖主東來中原鼎革近

都三百餘里盡設旗丁忽而林木陰森者變爲荒榛蔓草
層樓飛閣者變爲寒煙冷風穀擊肩摩連袂成雲者變爲
瓦礫荆棘鬼火狐鳴之域能不令人動盛衰之感乎幸而
運不終衰旗丁改戍畿南漸有起色會羅刹宇數亦當興
先大人與比邱輩商略指顧按休咎顧向背漸次部署闊
大其規曲折其徑由柳陰而入過茶園數武爲山門由山
門而入爲十王殿居左右又入爲太山行宮東西三楹前
後亦三楹面供天妃三像及司福祿子嗣災殃之神無不

畢具背面向水復供三大士及一切水府之神於是遊其地者無不曰彩畫莊嚴冠絕一時蓋其爲地也以林木勝以水月勝其爲僧也以戒律勝以詩畫勝以幽淡枯寂勝於是四方百里之遙求福者無不於是奔求祿者無不於是禱卽求名求利求子嗣求免災殃者亦無不於是祈也使數不當盛勢不當成何以禱爲之應祈爲之靈凡有入廟千求無不顯報而令數千萬人匍匐恐後也哉今遠近數百里共計千萬姓咸欲勒石以誌其盛吾知此地此刹將有盛而無衰也有成而無敗也將由衰而盛由敗而成更咸興興而無窮也於是爲之記

重修海月寺碑記

馬慎邑人

佛氏之教其來遠矣粵自周昭王甲寅二十四年有大聖
人生於西域是名曰佛中國尙未有也迨漢明帝夜夢金
人示瑞請經像入中國其教沛然大行內而王都外而羣
邑以及名山勝水靡不有寺有庵以爲祝釐之所也然重
其教而崇其法不特中國而已雖九夷諸番依歸趨向亦
與中國爲不殊其教廣大而難量矣邑之東北北樓堤村
西有海月閣寺實爲古刹歲月旣深傾頽已盡至明正統
間孫友得石明孫繳祥等發心重建正殿三間釋迦如來
左右伽藍殿肖像奇古金碧輝煌至正德間風雨湧浸傾

圮復如前日又有石大章孫大名張元孫景隆者繼先人之志捨田施財發心乞化助緣僧明海積聚銀糧捐資鳩工重建佛殿三間大佛一尊文殊普賢伽藍祖師天王等殿俱全比之前大有所恢宏也夫厥功落成方向規模嚴整清雅耀秀林木暢茂儼然一新請僧明海爲住持同功德主孫清乞言以記其事余維天下之道有二曰善曰惡而已惟人有善惡之殊天有禍福之報如影隨形若響隨聲錙銖不爽特遲速之間耳故佛教雖宗派不同不過俾人去惡爲善同生極樂無他道焉吾所謂善不特修佛造塔供佛齋僧而已凡守國法孝父母睦宗族和鄉黨存本

分心行平等事一切濟乎人而利乎物皆一念善心之所推也殆見以善啟善以心感心普天率土同歸乎善則人卽太古之民時卽羲皇之世也渾渾乎噩噩乎同享太平於無窮斯非爲善之所驗乎然則佛教大隆法輪將與日月同光江河同潤天地同其悠久也猗歟盛哉不揣而爲記併寺之形勢以及施財姓名共造於碑陰以備將來有所考而知焉

釣臺碑記

都察院右副都御史高承爵

大邑之東北四十里許有子牙村在焉村旁有河曰子牙河河干有臺曰釣臺者邑志所載卽太公垂綸處孟子所

云居東海之濱者也川源幽秀雲樹蒼深河水自南來繞臺之左而支流繞出其右兩岸皆爲大防防上林木扶疏參差掩映自臺而北迤邐至王家口河勢奔注匯爲藪澤水與天際杳無涯畔雖去海上百有餘里而煙霞飄渺若別有一天地焉意當商周之世必爲荒僻之區人跡之所罕至故公得避世而居於此厥後蜚熊入夢遇文王於渭水之濱則就養後發跡所自而是臺固其幽棲之鄉也臺故有亭肖太公像其中一竿一笠猶然漁父時狀耳至萬曆二年其裔孫貢士呂小等始因其故址而更新之擴亭爲廟像以冕旒略仿武成王廟舊制而以漢唐來名臣

之知兵者配之但世遠年湮堦下僅有斷碣字跡漫滅今
康熙之四十六年呂大生呂潭呂興鎬丕承前志復書其
事於石以垂久遠嗟夫公固百世殊絕人物跡其鷹揚著
績開八百年之姬錄夫豈湖海中人哉而世運未光則甯
淪於荒寒寂寞之區而不悔蓋隱居行義爲因其時自古
聖賢未有心不超乎天下之外而能浮雲富貴霖雨蒼生
者故公當日必有是臺之煙波蓑笠以自樂其樂而後有
他年之旄鉞丹書以憂人之憂此以知聖人之心憂樂同
原窮達原無所加損而前後顯晦之各異者則運會使然
也後之君子登斯臺者其亦可悠然想見古聖人素位而

行之道也夫

周太師尙父釣臺廟碑

進士

牛天宿

靜海人

大邑城北四十里土益腴徑益曲林深而水駛古堤東西立各丈餘許中來兩河相比而北下介兩河之間有土突出高僅三尺廣可數十步搖蕩於波光雲影中則周太師釣臺云噫亦神矣哉水之爲物善變而居漳水下流其性又至暴當其泉枯水涸雖五尺童子可褰裳而渡也逮至河伯肆怒浮地駭天巨浪雄濤朝夕不可方物世之岸柳煙村不崇朝而入蛟龍之窟者豈可一二計哉而是釣臺高僅三尺廣數十步測其高下僅得於堤四之一焉而水

時與堤爭不能與臺爭乃至兩河交會狂瀾四出不難掠堤而直下顧此釣臺一片土高高獨立其爲高三尺廣數十步者曾不能以尺寸滅世之儒者多不樂言奇事以視此者竟何如也得非大聖人之道德功業必不磨滅於天地之間而精神之所眷注尤在深山密林獨寐寤歌之地故興周其後也而渭水實先之渭水又其後也而東海之濱實先之則夫東海片席中舉夫鷹揚變伐之偉烈敬勝義勝之心傳無不蘊積於此乘會際運則出其素所有者以應之耳否則龍鬣之夢不作雖孤舟蓑笠寒江終老可也此大聖人之眷眷不能忘情於此而天地爲之默佑鬼

神爲之護持者也臺之上有祠不知建於何代卽燕山叢錄一書備載大城子牙瑤隨水高下雖大浸不沒亦不言祠故無所考舊傳明季台上有高像仍坐時狀噫此其歷代之遺製歟至萬曆二年李公名似海乃更爲祠冕旒南面配以後世善兵法者六人遵唐制也明末臧莊李公尹生截石爲碣將欲詳誌其本末會有土寇之擾事遂寢嗣此本邑大司寇劉端敏公修之雲貴總督王公諱繼文者過此又修之而碑記獨缺李公玉友尹生先生賢嗣也不承先志偕弟姪謀諸宗族出舊石於敗土中鐫文以記亦可見聖人爲百世之師而懿好尤有同然者矣李公玉友

邑貢生諱 萼性孝友其家同居者七世有張公藝陳兢之

遺風諸上司屢有旌表蓋賢而隱者也其不能無情於一

臺也亦宜

康熙丙戌仲秋立

重修碧霞元君祠碑記

禮部尚書 陳元龍

鬼神之有無皆起於人心而其自無而之有也雖情狀奇幻要以有功於蒸民而不悖於聖人之道則典禮之君子亦秩而祀之何則三代之典未始有淫祀也凡社稷岳瀆先聖先師固皆神之宜祀者降自秦漢釋老之道日行日盛然後名山大川像設諸天仙佛多至不可究詰而求其福濟羣生保護百物如碧霞元君者蓋鮮也元君祠祀泰

山自泰山而外所在祠廟不一而圻墀之祠有五類無不祀元君者使非神靈多所感應何以深入乎匹夫匹婦之心而崇信不衰也如是夫泰山爲五岳之一古者非封內之諸侯不得旅非有道之天子不得封且禪今肖其神爲婦人且建祠徧四方吾不知典禮之君子當以爲何如然吾嘗聞碧霞元君乃軒轅黃帝之所出垂衣而治有功於萬世則其女豈非神明之胄宜乎有感於人心而爲祠官之所不廢也且泰山膚寸之雲不崇朝而徧雨天下其澤及於人而有功於世也尤信而有徵是其神不必專食報於齊魯之郊又理之可以無疑者矣順天屬縣大城良臺

村舊有祠明萬厯年何守經創立歲久殿宇傾圮本村何

公

諱

玉柱捐資重建濶而爲三增修禪堂配殿客舍山門

經始於康熙五十九年八月落成於六十一年四月構櫺

丹黝煥然改觀而來請記於子子爲發明其有功可記得

附於社稷岳瀆先聖先師之秩而不悖於聖人之道如此

則何公之功不且與是殿同永也

康熙壬寅
六月立

九聖祠碑記

呂式榑 邑人

易曰聖人以神道設教而天下服孔子曰使天下之人齊
明盛服以承祭祀神之爲道昭昭也或曰神在人心誠至
斯顯然以實有監察於冥冥中者著靈應而人斯警慄欽

信焉東萬燈村九聖祠創建不知年所而村人世賴庇佑
歲時伏臘祈福禳災往往有應然祠之摧敗於風霜淋漓
將爲墟者數十年矣里中李母杜安人故千總武略騎尉

諱崇嶸公配也已丑八月安人病篤禱於九聖默以祝越

日而安人之病瘳又數日大痊九聖之靈何響應如斯也
其明年春安人以重修神祠之意白村眾且曰余自捐資
不累村人也迺擇吉興工閱月而工竣殿宇崇宏基扃固
護密瓦鱗布重簷翼舒薨棟則丹楮交輝棖題則金碧耀
采九聖列像其中巍然肅然深人敬悚壯哉觀乎視昔三
人獲庇佑神無棲止也奚若是舉也費錢千餘緡皆安人

所捐於村人無累焉然則有是舉而安人之誠志昭善行
著武略公之世德亦彰而村人賴以獲九聖之庇佑也未
有艾矣督修諸君將勒石以誌不忘索余言而授以意迺
述重修之始末而贅詞於左曰

神道福善應所求兮重修祠宇答神庥兮綏爰有衆惠同
儔兮九聖之靈安人之德並千秋兮

碧霞元君祠碑

劉鍾英邑人

蓋聞坤元載物至靜之德無疆富媪資生錫福之神有象
訪仙蹤於西母駕遠瑤池贊元化於東皇靈昭泰岱粵若
碧霞元君固承天而時行者也溯自震維配極喬嶽降神

心正直而聰明體含宏而廣大瑤霄朗照佑四海之蒼黎
金闕高居掌三天之亭毒顯應久傳夫日觀崇儀懋舉於
興朝歲四月十八日爲元君誕辰

皇帝欽命內侍御大臣一員詣岱頂碧霞宮致祭禮也夫
天子爲兆民祈福旣已殷薦其馨香率土爲 國家祝釐

豈可弗崇其祠廟彼南岳夫人之館翠檻星浮瀟湘帝子
之宮黃陵雲轟況元君爲萬靈主宰赤縣爲四方具瞻棟
宇未興曷以慰閭閻之望椒漿莫奠曷以伸胙饗之誠平
舒東十八里有句鍊師法善者宅心清淨惟道是從誦藥

珠之內篇究元君之妙旨每慨靈墟之廢誓興福地之工

精誠極而白刃穿善信至而滄溟動建珍樓於碧落珠綴
衝風架瑤殿於紫虛鴛鴦覆瓦林神在棟勢最肩而負虹
梁桂女臨窗容婉變而扶絳節載瞻玉座如到金庭廳廳
乎羽衛排雲駐九都之法駕肅肅乎霓旌翳日列翠水之
仙姝輪奐高而碧樹無遮天人合而元關洞啟珠旛電轉
法鼓雷驚瞻禮者衆一其心趨赴者人萬其善香烟滃鬱
疑屯岱頂之雲磬管和鳴妙合琅璈之韻脫非元君之沖
用烏能神化無方乎自時厥後三十載有善女人王氏者
操堅崑玉心慕飛瓊道寄行詮志因境立藥宮貝闕思百
千萬劫以朝眞翳雪餐風歷四十八盤而皈命洎還梓里

彌切霞思鍼神度則組繡橫飛黼幄成而雲霞萬色銖衣
掩嬖寶閣增輝猷九天眞母之前奪八紀夫人之巧某也

躬覩盛儀於琳宇爰稽神蹟於瑤編玉葉黃華

玉女卷言元君名玉

葉在黃華山

祇羽流之謬說金虹太乙

見道藏

亦道藏之虛辭據

禮典以綜觀實地祇之宗主所以神周萬寓廟祀千齡龍
護臆則月鏡虛圓鸞舞樹則天花亂下或天孫晉謁振環
珮而流風或神女來親倚翠旗而行雨從此留雲碧宙聿
增東嶽之行宮效職玉京永延北辰之寶祚敢作頌曰

二儀覆載大德日生養精降德泰岱崢嶸於赫元君福綏

九有承上帝命爲天下母於赫 聖清尊命敬神崇修廟

貌慰此下民下民欣欣願伸私祝各建靈祠匪殫土木芸
生樂止玉帛重重元君戾止和鸞雝雝式是仙居碧霞紫
府載勒穹碑炳靈萬古

祠在大
流漂村

創修鳳臺書院碑記

任聯第

子輿子曰知者無不知也當務之爲急仁者無不愛也急
親賢之爲務夫時當龍蛇起陸虎豹臨戎爲宰者方應接
不暇而亟亟於講學興賢修其三物張其四維直欲以忠
信爲甲冑禮義爲干櫓效投戈講藝者之所爲鮮不笑爲
不急之務然使天下之爲宰者皆能建學興賢與士民修
三物張四維又何至龍蛇虎豹之紛紛哉天下事未有本

不治而其末不亂者也知仁之爲治亦溥本肇末而已粵
稽書院之設與學校相表裏風教之攸關人才之所出自
京師以至郡邑皆有之而平舒無之獨何歟蓋莅斯邑者
或憚其難而不爲或欲爲之而不果則信乎非常之事必
待非常之人也同治五年崇安春圃彭公來理平舒甫下
車卽謂予曰典制代有更張學校則古今不易今邑有學
校而無書院何以丕振文風乎縣北沿莊現有官荒地廿
餘頃詳請升科爲書院經費余倡之諸君贊之可以集事
聯第等深知其難然心壯其言不敢不勉於是總籌全局
收租幾何捐金幾何書院之賃價院中之器具同長之脩

金諸生之膏火共須幾何以至官齋之課期月幾何日城鄉之董事年幾何人詳加酌核復諸彭公公遂通詳大憲奏請升科而鳳臺書院立焉豈非有志者事竟成哉夫創修於今日亦綦難矣盜賊縱橫軍書旁午雖素有之書院亦多以兵燹廢而我公獨能殲馬賊以救民復啟鳳臺以育士厥功懋矣其特簡知府賞戴花翎也宜哉獨是善作者不必善成今觀成於一時賢侯與僕等之責也至繼成於百世則不能無望於後賢矣邑人喜書院落成將勒碑以記以予始終其事知其成之難且深悉賢侯之心有合於急先務急親賢之旨也因大書其事誌賢侯之

德且以勸來茲云

墓銘

段鑑墓碑

嘉靖戊申春段公卒從孫臻持所爲行狀懇予表於墓左
予與公孫有舊誼烏可以不文辭按公諱鑑字公照其先
居安徽潁州建平縣永樂二年大移南人曾太父子眞者
得編氓順天文安縣豐富屯倥偬間扶母陳氏卜居青縣
流河鎮迨太父祜配曹氏父志良配于氏相率治田流河
西十五里許大城縣屬愛其土沃而俗淳遂以姓氏名其
鄉曰段家莊公生而穎敏雅好讀書以早失怙恃且子立
遂隱於賈嘗遊清源濟徐間書史不離側所至人求試其

占卜時或占會百物億而屢中人皆尊信之尤輕財喜施
所識窮乏者每每候公舉火見貧苦親鄰有喪不能舉者
傾囊助濟之時繼母張氏在堂公孝養彌篤張卒公治喪
周肅不食者五日鄉人莫不賢其行靜海陳都憲近昶公
耀公之故交也罍誤杖死無一人不畏避者公適寓京師
昇屍抵張家灣祭載以歸人皆義之李公者錦衣揮使也
貿易江湖金帛動以萬計悉託公總攝而不問其出入竟
其數一無所私如是傳五十禩濬縣屬地名屯子者水有
大石爲患損壞舟楫公奮輸百金廣募有力者去之衆感
其行刻石於側以識其行嘗主稻口鎮劉綬家綬與其悃

雅重公如神明綬卒公躬弔之遺白金三錠以恤其嗣且
生平不私餘積凡宗族因親故舊有困乏者每周恤惠濟
不責酬償至鄰眷凶喪出貲加賻要有數千金雖公疾大
漸彌留之際益悉仁惠于姪孫俯仰未瞻者誨囑諄諄以
勤儉立家爲本聞者莫不賢而德之公胸次坦坦寡絕嗜
慾誠心待物不畜鱗甲晨起飲不過三爵食惟用疏衣不
過布蓋其天性然也公言論愷切衆皆心悅而誠服暇時
隨意吟詠舉可記誦人嘗稱表正閭里有陳太邱之風勸
誘爲善有王彥芳之志清修不污似徐孺子汪洋無際似
黃叔度士大夫親之如程明道奴亦化之如陽道州輕財

喜施如范文正云公生於成化十八年十二月二十四日
戌時卒于嘉靖二十七年三月十一日亥時得年七十有
六配鄴氏賢淑著聞先公三年卒子一應歧娶路氏入粟
補授縣令女四長配張元祉次石文德次劉榮次楊岱孫
三長珂己亥恩科進士娶王氏次璣次珩尙幼孫女三長
配楊太仁二女亦尙幼再孫一名印喜珂十月十二日合
窆青縣流河之祖塋嗚呼若公者戴仁履德多福多壽有
子有孫誠爲難得繼公之後者尙知所以式穀也哉

嘉靖
戊申

十月

立

皇清敕授文林郎累晉承德郎加奉直大夫原任 盛京

京兆尹加一級弱水李公墓誌銘

劉 棬

邑人

君子生而具濟世之才乘時利見宰試荒城弦歌四訖尹承上國政教彰明猷爲間不可易量一朝溘逝大才有未殫之施蒼生歛霖雨之望如我弱水李年翁眞可爲太息者也令嗣簪卿述公行請誌於予予與公少同蘭譜繼結姻盟知公最悉雖愧不文情何能已用是揮淚濡毫而直誌之公諱翼鵬字弱水號翥九先世晉之太原人自明永樂二年徙於平舒越數傳至公高祖父寬有文名寬生四子曰綱曰綸曰紀曰緒咸翩翩焉紀生謹謹生佩公之大父也著有隱德邦人稱之生子二伯氏夢桂仲氏夢春字

和宇敕贈奉直大夫少孤事太孺人畢以孝聞太孺人因得頤養優游享年九十有六事伯兄友于無間存心仁恕慷慨樂施鄉里奉為長者晚歲舉公人以為德報公生而穎異有陸佃之目十歲能文聲噪童烏年舞象即補邑弟子員屢試冠軍食廩餼姿品豐腴聲響噲员口無擇言坦率而真摯博通淹雅為滄溔而不羈乙酉科升書司馬丁亥為副卷第一人例副進士當居外翰時丁太安人艱公哀毀骨立閉門讀禮不詈不矧即二連無多讓焉己丑服闋授順德府平鄉縣學博講學明倫巖巖自重樸棧菁莪之化蔚然振起可與袁隗張侗為頡頏迎養太公於鱣堂

蔬水承歡融融養志平邑士子多感興焉公不徒教人以
本業且能率人以本性也後太公旋里忽爲北幽遊公聞
訃星馳躡踊哀號幾不欲生時值凶歲一切襄事無不竭
蹶如禮遠邇以孝傳焉丁酉起復爲真定無極教諭以龐
公愛士之心篤郭泰成才之雅多士悉彬彬矣戊戌陞廣
東西甯令甯邑遠在南服界連西粵當草昧初闢之日煢
煢葺屋悉刀鋸之餘生時而烏合鹿聚時而星散鴻驚最
難撫字者也且地方八百餘里皆崇山峻嶺瘴霧蠻烟虎
豹偪人獠獍梗化最難催科者也公甫下車虎卽渡河遠
去民爲俚歌梓傳之焚疏投虎之治已見一斑矣公保子

遺如保赤子善者加以獎勵獷者諭以禍福不競不緣立
威立信勒石以減米價緩征以寬舊逋立市以資貿遷葺
學宮以大文教建衙署以肅規爲善政秩秩有序庚子分
闈所得皆名下士時有大役民實難之公連章飛牘爲民
請命得終免焉如是逃者返匿者出頑者梗者革面革心
喁喁向化方面鮑君常致書於公云佻儻凋瘵之邦病者
以甦勞者以息反側者以靖此等功德當不在紀勳考績
中求之又云非具理煩治劇之才而出以至誠動物之本
者談何容易計冊兩次皆注循良第一辛丑恭遇覃恩
授文林郎嗚呼如此盤根錯節人之咄嗟莫辯者公出慧

鋒智劍而爲之眞恢恢乎游刃有餘矣甲辰秋擢承德京
尹德邑乃興王重地又爲新造之邦諸凡悉屬創舉非
德以立威誠以昭信勤以蒞事未易善根本之圖公建縣
治編里社課耕稼崇祀典修學宮立廛市揆文教奮武衛
者無不畢至仁聲嘖嘖不惟士民豫附卽勳貴皆嚴憚焉
安在南陽可問而宏農不可問也哉績上銓曹紀錄十四
次丁未蒙恩詔欽賜表裏二襲加一級戊申恭遇覃
恩晉承德郎加奉直大夫復蒙欽賞表裏各一襲數膺
宸眷如此歸田來裹足不入公庭郭外建茅屋三楹日與
園夫農父坐臥其上話桑麻比畝畝較晴量雨鞭青犢而

聽黃鸝回則挑燈課子含飴弄孫有酒卽醉旣醉必詩詰
旦而出日晡而入往來城闔間乘一羸馬隨一蒼頭飄飄
然流水行雲自若也一時無病而逝旣無刀圭藥餌之煩
又無呻吟牀褥之苦斯豈非快丈夫事耶公生於萬厯癸
丑年六月十一日寅時卒於 皇清康熙壬子年十二月
初六日酉時享年六十歲元配劉氏任浙江杭州府稅課
司晶玉劉公長女崇禎己卯年卒贈安人繼娶劉氏晶玉
劉公次女順治庚寅年卒贈安人續娶張氏邑庠生汝愛
張公次女封安人康熙丙午年卒男女二長從繩貢監生
候選州同知娶邑處士薛公國賢次女繼娶邑進士江南

鳳陽泗州知州馬公璣妹太學生馬公希憲次女元配安人劉氏出次從楷聘邑貢生候選州同知梁公之才女不祿女二長適江南太倉州知州楷弟長子太學生榕次適以下闕

刑部尙書諡端敏劉公墓誌銘

高陽人任
戶部尙書李 蔚

公諱榘字玉壘別號公愚先世爲山東汶上人後遷順天府大城者公始祖士元也代有隱德明農不仕數傳至公王考諱灝者贈通奉大夫劉氏乃漸顯是生公考副憲公諱漢儒舉壬戌進士仕至都察院左副都御史歷官所至

著名績鄉里尤稱長者配王夫人則公妣也公爲副憲公仲子幼而嗜學工制舉業補博士弟子有聲以順治二年乙酉舉於鄉明年成進士值國初特典選授戶科給事中旋轉左右歷吏兵二科以劾外吏墜誤罷歸居久之以薦起原官補兵科甲午典試閩中會世祖皇帝講求官人之法內外互用乃出公爲山西按察司副使分巡河東道歷河南布政司參政分守河南道陞湖廣按察使遷布政使以母憂歸繼丁外艱服闋補江西布政使內陞太常寺卿轉大理卿左副都御史以疾請告不允進吏部侍郎隨擢刑部尙書履任未幾復以病力辭得請甫抵里卒康熙

已未五月十三日也訃聞 天子爲之軫悼褒卹有加特
賜諡曰端敏遣官致祭立碑墓道典禮之盛朝野榮之公
胚胎世美處厚席豐器宇沈靜幹具閎敏少而刻苦於文
學壯而奮揚於政事用能不紹前徽卓樹遠大官守言責
克自表見足以照今垂後其官諫垣建白無虛月民生吏
治諸務指陳尤力如議緩征拯流移給牛種諸疏皆關民
生之切者飭巡方糾撫鎮愼考察大吏諸疏皆關吏治
之要者其爲副憲造膝而陳多屬軍國大計其見於封事
者如請蠲江右亂後之逋賦密陳閒道進剿之機宜皆見
諸施行卒有成效在河東則招降萑苻寬諭赤子以不濫

誅在河南則釐革罰贖痛絕苞苴吏以無訛法司臬憲則
弘淑問之規持風紀之度寬猛得中而民頌不寃領藩伯
則田野所必闢芻糗所必侍軍民利賴而績登上考其由
卿寺院部洊履華要所處職靡弗舉以恭勤結主知以信
義孚僚友生平無刻礪之言矯激之行近古所稱鉅人長
德焉蓋公敷歷中外其大而可紀者如此他懿美遺事詳
之家乘者未遑書然足以傳矣公生於丁巳得年六十有
三配封夫人陳氏前乙卯舉人遵義府推官國維女妾南
氏宋氏子男五長性歲貢生候選國子監學正娶丁亥進
士前任四川巡撫羅公森女陳夫人出次忙庠生娶壬辰

進士前任雲南布政使崔公之瑛女早世南氏出次憬太
學生娶己丑進士翰林院侍讀學士李公儀古女乃公五
弟遺孤撫爲己子者次懔聘丙戌進士原刑部侍郎于公
嗣登女次懔尙幼俱宋氏出女一配己丑進士監察御史
高公爾修子歲貢生恆升陳夫人出孫男一琬性出孫女
一忙出俱幼性卜以今年辛酉八月二十二日葬公於張
街村北原之兆域以余與公同里閭同舉鄉會試仝官於
朝遊處之久而知公之稔也旬銘其墓嗚呼副憲公王夫
人之歿也余旣先後銘之矣而茲復銘公今昔盛衰之感
豈直爲公慟哉爰系以詞曰御龍世望沛國彭城由汶而

燕乃啟高閎發祥奕葉篤生名卿以熙庶績以颺大廷翼
翼司寇升華天造起家掖垣厥囊維早經營出入屏毗是
效進長秋官亮工弼教仁心爲質利溥肺喜不懈於位德
音孔遐嬰疾屢請天寵彌加嚮用伊始殄瘁俄嗟 帝曰
吁哉失我良士節惠飾終宸章攸紀鬱鬱佳城平舒之里
鑄石幽宮永綏後祉

擢用陝右延安府安定縣令監河務王公墓碑

進士淮安府知府 王穀韋

公諱照乘字孟犀號允大順天大城人也其先宋元間世
居中州逮明建文末靖難兵起有諱安者才力恢宏以武

功底燕京因家於大城是爲公之始祖再傳諱建有聲於
憲宗之朝生二丈夫子同時官錦衣又傳諱經卽錦衣指
揮使也武宗目以爲能又傳至臨江公則公之高祖以子
貴封文林郎曾祖志菴公神宗廟明經尹汶上多惠政祖
考樸源公亦以明經秉真定鐸考省畿公領袖郡庠志未

大伸士論惜之王氏遷大城後歷以棨戟顯自安鄉伯張
公女省畿公之配公之妣也懷宗季年闖賊蹂躪畿輔妣
負烈士性罵賊而死有司以其事上聞旌之今載在郡志
公幼負奇氣且離世變遭坎塲強敏綜練莫與爲儔人或
勸之仕則曰古人捧檄而喜蓋爲親屈也吾淚枯血盡安

事縻祿爲俟值盤錯試吾利器可耳今 天子御極十四
年關中不靖禁旅西征我公乃按劍奮然曰是鴛鷺者輒
敢梗化乎免胄而馳所向無敵人咸壯之嗣欲滅此朝食
馬驚躓焉公謂以身殉國固臣之分會須伺隙以有爲耳
後果克復延安悉由密算大將軍紀功奏凱補安定尹安
定巖邑也潢水盜筭後民率烏獸散公扶傷恤災曲爲撫
字不知有兵革慘方之召杜覺彼處其常此獨處其變焉
尹苟曲事要津自無簿書愆乃公爲薑桂不爲脂韋早賦
歸來意泊如也由是寄興風塵絕口不言天下事比者淮
揚兩郡河伯肆虐當宁每厯南顧之憂特簡大司馬靳公

督其事靳公念臂指乏人績何由奏稔公之名旣一時士大夫又僉以公爲能因羅之幕下曰凡茲櫛風沐雨之員皆賢豪間者流尹其悉心監理之予將移尹爲干城寄焉公受劄膺符不遑啟處一畚一鍤一石罔不悉心籌畫迄今淮揚兩郡耕夫織婦樂業如初公之功爲最逝之白悼慟之聲合萬如一轍噫嘻生榮死哀公豈偶然也哉公配茹氏生冢子鎮現登仕版次子欽國學生皆有父風功名俱未可量諸孫沛沆冀英玉立詢益熾益昌云君幽宅卜於淮甸勒名銘勳生者事也茲余濫守淮郡與公共事知公最深因敬爲辭以表之辭曰

起中州適畿輔溯閩閩兼文武鍾偉人光宗譜奮志勇殲
豺虎尹巖疆民安堵慵折腰風斯古纘禹功蒞淮浦挽狂
瀾成樂土景鴻勳衆所覩安窳窳歷寒暑摹豐碑高如許
史載筆於斯取

康熙三十三年歲
次甲戌孟冬朔旦

劉封翁星池偕配趙宜人墓志

呂式棟

封翁姓劉諱濟源字星池順天大城人也其先世籍山西
洪洞縣故明永樂間徙晉民以實畿輔迺卜宅於邑北之
王家口遂家焉十一世公父孔及公德行著於鄉配氏楊
有婦德生子四人公其季也生而聰穎性端慤少長受書

過目成誦未冠從學於同里王砥如先生學爲詩文落筆

輒軼其儕輩先生器重之既冠補博士弟子員益嗜學切切以振家聲爲志家極貧雖日不舉火而下帷誦不輟恆終歲不入市廛卽林園中亦尠見屐痕也公元配趙宜人生子三女一長子元亨字會廷次元戎次元獻幼皆受經而會廷最慧公每以光大門閥期之以貧故艱於儋石歲攜會廷課讀於外宜人撫二子一女於內教養分任之公意殊適至忘境遇之艱每自課課兒之暇輒對酒吟詩又博習羣書而於數理尤精悉焉無何趙宜人以疾終公以缺內助攬心米鹽遂無意上進而以素志期諸會廷於是會廷遊郡庠咸豐辛酉領鄉薦光緒戊寅以倉差勞績迭

蒙倉憲保奏奉旨以知縣儘先選用加同知銜準予五品封典尋授唐山縣教諭公以子貴遇覃恩封奉政大夫公配贈宜人公喜形於色曰吾所望於吾子者原不止此然余老矣猶及見吾子登仕版於願已慰雖冷署微官亦可就養豈澀飯稀羹不足養吾老耶會廷甫抵唐山學署卽擬以安車迎公而車未抵里公竟以痰喘疾終於家時光緒壬午四月二十四日也壽七十有五趙宜人終於道光二十三年三月二十八日壽四十先後合葬於村西北一里先塋乾山巽向銘曰

公學淹博公品清超處逆若順其樂陶陶方古賢士詩伯

酒豪繁惟宜人天水賢媛其身淑慎其心塞淵克勤克儉
以相所天望厥封兮若堂鬱松柏兮蒼蒼松柏敷蔭兮其
下蘭苗而桂芳枝葉永茂兮長發其祥

烈女馬氏墓碑記

大城
訓導陶

圻彭澤
人

大城京兆屬邑也邑雖小而風俗之純甲他邑男尙忠義
女尙貞烈相親相染厥惟舊矣故烈女馬氏諱四德者耆
民鷹之女也性聰慧略涉書史兄庠生憲居嘗讀書烈女
亦能摘句求解焉至於女事莫不精緻閨門之內矩矱整
如年十七父母諾程氏子而未醮焉正德辛未六月十二
日馬賊劉六等猝至其里曰廣安店劫掠財粟虜執婦女

事勢危迫人悉奔竄烈女計出珍藏賊索得之悅其容色欲行無禮烈女曰妾生長名族清白世所守也此身可死不可污賊入分所有烈女乘間匿於後園窖中賊遂執其父加以刀烈女自度此身雖免患必貽父吾甯死以脫父可也賊得女釋其父驅之行女泣罵曰汝強賊旣掠我財毀我室而又虜人之婦女不道極矣天誅爾身事在旦夕可不省與賊曳之女堅不行且罵不絕口賊怒而殺之賊退移日家人還故處收烈女屍時天盛暑烈女容色不變蠅蚋不嘜凜然若有生氣鄉黨宗族憐而葬之旣而巡撫都憲李公貢有查舉節義厲民風以彰聖化之檄州守王

公汝翼卽以是而應之侍御吳公樟按其實以進正德甲戌秋七月詔賜旌表其門仍給白金三十兩爲坊牌之資縣尹石公恩實奉行之於戲休哉夫閨門貞烈自古爲難如唐奉天竇氏二女義不苟辱死於投崖馬氏之死發於貞烈如此固厥俗漸染所成矧於顛沛之中能以身代父命其孝尤可重也噫窈窕之柔質克全孝烈之大義擬之竇女殆猶過焉然當是時賊所經者非一地所虜執者非一人雖丈夫未聞有舍生取義若烈女馬氏誠可謂烈火中之眞金乎疾風中之勁草乎爰書其事於墓石俾垂清風於不朽云

碑陰

正德十年歲次乙亥八月乙卯朔越二十日壬午大城縣
知縣石恩縣丞周忠苟良主簿石彪典史劉玘教諭李茂
暘訓導黃繼宗陶圻謹以牲醴庶品致祭於旌表烈女馬
氏四德之墓曰合浦之珠圓而且明崑石之玉瑩而且溫
卓哉烈女珠玉其倫年方及笄女事克精素鍾父母之愛
實堅閨閫之貞旣憑媒妁之議未諧伉儷之姻胡遭荆棘
之患竟遇芝蘭之焚曳我衣襟迫我遂行顧我斯身價重
千金仰觀青天白日是我死所俯觀黃塵芳草爲我佳城
甯捐生於霜雪之刃不受玷於豺虎之羣唯唾罵之不息

何軀命之苟存甯爲潔身之竇女敢計完節之蘇卿嗚呼
珠旣墮矣不替其明玉旣碎矣不改其溫幸而貞風之上
達卽蒙聖詔之褒旌我等末官聞風鼻酸拜奠芳塚萬年
偉觀

李門節烈婦邢氏墓碑記

道光丙午
科舉人

宋寶琨

邑人

光緒紀元之夏四月予以久除川吏板輿道遠侍養家居
適聞陳村李節婦事肅然動容洵足勵人心而維風化急
商之同人述詞聯名呈邑侯莊公據詳請旌並因續修縣
志擬立傳以垂久遠其合族爲之建碑修墓敦請爲文以
表其阡予以呈名在列不敢以不文辭按節婦氏邢城南

務農屯田家女幼字李氏其夫名連科前明兵部侍郎諱松八世嫡派孫也早失怙恃終鮮弟昆薄田十餘畝餽粥自給泊邢氏于歸年十七少夫五歲居賤食貧伉儷甚篤饁餉佐耕作辛苦備嘗每屆舅姑諱日潔資盛偕夫祭掃盡哀盡恭五年以來鄉里藉藉有賢聲去冬夫染時疾甚劇晨夕視湯藥目不交睫者兩月並禱於神明誓以身代孰意病竟不起正月二日氏泣浼族人經營窀穸維時年僅二十一歲零丁孤苦生計艱難而處之晏然人僉以爲必無去志其母乃急欲奪而嫁之其姊又從而絮聒之乃氏情深一往節矢獨完遂於三月初五日夜間閉戶自經戚族

憫之具棺殮合葬先塋並擇近支姪行嗣之嗚呼節婦如此可不謂烈乎本農家之弱息偏能慷慨以捐軀明大義於芳年特以從容而全節金石堅而鬼神可質貞珉建而日月爭光凡斯世之孤鸞寡鵠未能自勵於衾影間者聞邢氏節烈之風亦可以奮然興矣